

## VARIA

PERKEMBANGAN teknologi maklumat dan komunikasi yang canggih mempercepatkan lagi proses penjajahan minda dalam kalangan Generasi Y.  
— Gambar hiasan



PENJAJAHAN minda mampu memporak-perandakan negara seperti yang berlaku di Asia Barat.  
— Gambar hiasan.

# Penjajahan minda Gen-Y

**S**EBELUM mencapai kemerdekaan pada 31 Ogos 1957, Malaysia telah dijajah oleh beberapa kuasa asing seperti Portugal, Belanda dan Inggeris sehingga mencecah ratusan tahun.

Sepanjang tempoh itu, rakyat di negara ini terpaksa tunduk dan akur dengan segala peraturan yang telah ditetapkan oleh kuasa penjajah.

Ketika itu, rakyat tidak bebas melakukan aktiviti harian kerana semua pergerakan dan tindak tanduk mereka dikawal oleh penjajah.

Kini, zaman penjajahan seperti yang pernah dialami masyarakat dahulu sudah menjadi sejarah.

Sebagai sebuah negara yang merdeka dan berdaulat, masyarakat di negara ini bebas melakukan aktiviti harian tanpa terikat dengan peraturan dan undang-undang daripada kuasa asing.

Pada 31 Ogos 2016, maka usia kemerdekaan negara ini akan mencapai 59 tahun.

Persoalannya, apakah masyarakat dan rakyat di negara ini juga sudah merdeka? Memang benar, sebagai sebuah negara, Malaysia berjaya mengcapai kemerdekaan daripada penjajah.

Pada umumnya, masyarakat di negara ini telah merdeka tetapi mungkin merdeka dalam aspek fizikal semata-mata.

Bagaimana dengan kemerdekaan jiwa dan minda? Untuk menikmati kemerdekaan total, rakyat perlu bebas daripada sebarang pengawalan dan belenggu daripada pihak luar sama ada dalam aspek fizikal ataupun minda.

Namun, senario seperti ini amat sukar untuk dikawal terutamanya pada zaman teknologi dan media sosial yang mempunyai pengaruh kuat dalam masyarakat.

Situasi paling membimbangkan pada hari ini ialah penjajahan minda yang

## Sudut Pandang

Oleh PROF. DATUK DR. MOHAMMAD SHATAR SABRAN Pakar Sosial dan Timbalan Naib Canselor (Hal Ehwal Pelajar dan Alumni), Universiti Putra Malaysia



berlaku kepada masyarakat terutamanya dalam kalangan Generasi Y atau Gen-Y.

Penjajahan minda ini merupakan penjajahan format baharu dan impaknya adalah jauh lebih bahaya daripada penjajahan fizikal seperti yang berlaku kepada

Malaysia sebelum 1957.

Melalui penjajahan minda ini, musuh mudah untuk menguasai hal ehwal pentadbiran negara tanpa melakukan sebarang kerosakan fizikal dan peperangan.

Penjajahan minda ini merupakan kaedah yang sangat efektif untuk menguasai landskap pentadbiran dan politik sesebuah negara.

### Maklumat palsu

Penjajahan minda merujuk kepada usaha untuk menguasai pemikiran masyarakat melalui penyaluran maklumat palsu dengan tujuan menimbulkan kepincangan dan konflik dalam masyarakat itu.

Melalui kaedah ini, pihak yang tidak bertanggungjawab akan berusaha untuk memastikan masyarakat yang terlibat percaya maklumat palsu yang disebarluaskan.

Akhirnya, ia mencetuskan rasa tidak puas hati masyarakat kepada kerajaan yang memerintah ketika itu.

Apabila berlaku perkara sedemikian, pihak yang terlibat mudah untuk memasuki dan mencampuri hal ehwal pentadbiran di sesebuah negara itu.

Tidak mustahil juga, pada akhirnya negara itu diurus sepenuhnya oleh mereka.

Kehadiran teknologi maklumat dan komunikasi (ICT) yang begitu canggih juga mempercepatkan lagi proses penjajahan minda pada hari ini.

Perpecahan yang berlaku di beberapa buah negara di Asia Barat adalah contoh terkini mengenai kesan daripada penjajahan minda kepada sesebuah negara.

Keadaan yang sama tidak mustahil

akan berlaku kepada negara tercinta ini sekiranya Gen-Y dan masyarakat umumnya menerima serta mempercayai segala bentuk informasi yang diperoleh melalui media sosial tanpa menyelidik terlebih dahulu sumber maklumat itu.

Kealpaan masyarakat khususnya Gen-Y untuk memastikan kesahihan maklumat itu benar atau sebaliknya sebelum menyebarkan mahupun mempercayainya, menjadi senjata yang amat berkesan kepada musuh untuk memporak-perandakan negara.

Musuh negara akan bersorak kegembiraan apabila maklumat palsu yang disalurkan itu berjaya meyakinkan masyarakat di negara ini yang akhirnya mencetuskan konflik dan rusuhan antara kaum atau rakyat serta kerajaan.

Sebelum nasi menjadi bubur, Gen-Y perlu berhati-hati apabila menerima sebarang maklumat terutamanya yang diperoleh melalui media sosial.

Kesahihan maklumat itu perlu disemak sebelum mempercayai kebenarannya ataupun berkongsi dengan pihak lain.

Gen-Y perlu sedar bahawa kecermerlangan, kemajuan dan kemakmuran negara yang dibina selama ini perlu diteruskan untuk dinikmati oleh generasi akan datang.

Justeru, sebagai waris kepimpinan negara pada masa hadapan, Gen-Y harus memastikan segala keindahan dan kesenangan yang dinikmati pada hari ini dapat dikekalkan.



MEDIA sosial mempunyai pengaruh yang kuat dalam kalangan masyarakat pada hari ini.